

35 milliuns pli pauc per il Grischun

Il cussegl federal vul reducir ils tschains d'aua ed uschia distgargiar ils concerns d'energia

DA MARTIN CABALZAR

■ Per ina fasa transitorica da trais onns vul il cussegl federal reducir ils maxim dals tschains d'aua d'actualmain 110 francs per kilowatt sin 80 francs per kilowatt. Per chantuns e vischnancas concessiunaras muntass quai ina reducziun d'annualmain radund 150 milliuns. Per il Grischun persul muntass la perdita radund 35 mil-

liuns. La ministra d'energia *Doris Leuthard* è sa mussada persvadida che questa soluziun resguarda commensuradamain tant ils interess dals concerns d'energia idraulica sco ils basegns da las vischnancas da concessiun sco dals chantuns muntagnards. Il tschains d'aua è in'indemnisaziun per il dretg d'explotar auas publicas per la produziun d'energia. Ils chantuns defineschan l'autozza da quest tschains, la confederaziun decretescha dentant in maximum. Dapi l'introducziun dals tschains d'aua che datescha dals 1918 èn quels creschids successivamain e muntan oz a 110 francs per ura kilowatt brut. La soluziun vertenta è garantida fin la fin da 2019. Il cussegl federal ha messier en consultaziun la revisiun correspundenta da la lescha dal dretg d'aua. Ovras idraulicas che obtegnan credits d'investiziun duain vegnir deliberadas per 10 onns dal tschains d'aua. Questas contribuziuns duain vegnir messas a disposiziun per novs stabiliments idraulics u per ovras existentas che vegnan engrondidas essenzialmain. Sco alternativa metta il cussegl federal en discussiun l'opziun da reducir il maximum da tschains mo per ovras che èn cleramain deficitaras. Oz flessegian annualmain radund 550 mil-



La forza idraulica è actualmain sut squitsch pervia dal sustegn statal ad energias alternativas che sfalsifitgeschan il martgà. R. CANAL

liuns en las cassas dals chantuns e da las vischnancas concessiunaras d'ovras idraulicas. Cun la soluziun transitorica sa reducessan questas entradas sin 400 milliuns. Ina cumpensaziun da questas perdidas en il rom da la gulivaziun da finanzas n'è tenor il cussegl federal betg pussaivla, damai ch'i na sa tracta betg d'entradas fiscalas. Cunzunt per ils chantuns Grischun, Uri e Vallais èn ils tschains d'aua essenzials.

Las reacziuns èn massivas

Ils plans dal cussegl federal han gia provocà las emprimas reacziuns vehementas or dal Grischun. La regiun muntagnarda vegnissan uschia chastiadas, è la critica. «Jau sun trumpà! Cunquai pon ils chantuns nua ch'ils concerns d'electricitad èn da chasa sa sanar sin custs dals chantuns da muntogna. Jau sun trumpà», di *Not Carl*, president da la cuminanza d'interess da las vischnancas da

concessiun grischunas. D'in sbagl fundamental tar las ponderaziuns dal cussegl federal discorra la Conferenza da las regenzas dals chantuns alpini. Ils problems tar las ovras idraulicas na derivian betg dals tschains d'aua, mabain d'ina politica d'energia fallada.

Per la pcd grischuna èsi inacceptabel ch'ils chantuns muntagnards han da pagar il pretsch per regulaziuns statalas che mainan ad ina concorrenza betg eguala.